

## Codex.

*Magnifice inspirati sunt enim in verbis, quae didicerant, et coadunati sunt omnes in ierusalem iocundari secundum dispositionem domini dei israhel.*

Neque tamen propterea Nostra de Graeco LXX. versa sunt. Graecus enim Textus sistit in καὶ ἐνωμῶν Ἰσραὴλ, et coadunati vel congregati sunt, et ultra non progreditur; imitantur tamen Graecos, apud quos apocryphus hic Liber *Esdrae Primus* est, genuino Libro *Primo* unacum *Nebemia* ad secundum locum retruso. Finem huic Parti imponunt II. *Machabaeorum Libri*, quorum priori Elenchus *Capitulorum* LVI. praefixus est; posterior vero C. 12. a v. 43. memoriam Defunctorum rite celebrat.

## V.

*Pars III.* numerat *Foll.* 134. complectiturque *Novum Testamentum* hoc ordine: IV. *Evangelia*, *Epistolae Pauli*, *Actus Apostolorum*, *Epistolae Canonicae*. I. *Job.* c. 5. v. 7. sic habetur: *Quoniam tres sunt qui testimonium dant in terra. spiritus aqua et sanguis. Et tres unum sunt. Et tres sunt qui testimonium dant in celo. pater. uerbum. et spiritus sanctus. Et hij tres unum sunt.* Claudit Opus decumanum *Apocalypsis*, cujus 11. ultimas lineas minori laciniae inscriptas *Compactor* inter *fol.* 132 et 33. inseruit,

## Edita.

*Magnifice enim sunt exaltati verbis, quibus edocti sunt, et congregati sunt universi in Jerusalem celebrare letitiam secundum testamentum Domini Dei Israel.*

monente id ad calcem *Gallo* quondam possessore, qui tamen non monuit, plura Folia a me superius indicata excidisse. Ceterum observaverit Lector, praeter *Baruch* etiam huic Bibliothecae Divinae *Psalterium* deesse. Ego vero addo, singulos paene Libros instructos esse Prologis *Hieronymi*, aut aliis illis Argumentis, quibus in Bibliis glossatis praemuniri consuevere.

## VI.

*Codex* membraneus lat. Sec. R. 305<sup>r</sup> XIII. Folior. 340. f. maj. per duas columnas luculente exaratus, coloribus distinctus, et quondam, ut ad calcem notatum est, *Domus sancti Job. baptiste In Seycz*, quae fuit *Carthusia Styriae inferioris*, est *Pars Prior S. Bibliorum* Versionis vulgatae, *Hieronymi Prologis* et solitis *Argumentis* instructae, et consueto ordine decurrentis usque ad finem L. *Job*, quem, nescio qua ratione factum, excipiunt D. *Pauli Epistolae*, in quibus haec *Pars* terminatur. *Librum Esdrae II.* haec solum modo Nota miniata distinguit: *Verba Neemie filij helchie*; et ad ejus calcem: *Explicit liber hesdre*. Igitur

tur Librarius non nisi *unum* ejus Librum adgnovit. *Hieronymi* Prologum in L. *Esther* scribere auspiciatus est ille a lacinia de *Rufini Alphabeto*, cujus *νοθεια* perstrinxit *Vallarsius* in Not. ad *Hier. div. Bibliothecam*, *Martianaes* vero in Edit. *Maur.* T. I. col. 1137. etiam demonstravit; sed monuit alia manus in margine: *Non scribas hic, sed postea*, et ad finem genuini Prologi: *Sequitur ruffini in libro, scribas sine capitali*. Neque igitur *Corrector* iste *νοθεια* suspicatus est, sed ordinem tantum praeposterum castigavit. Ceterum variis in Exemplis legitur *Rursum* pro *Rufini*.

## VII.

Pars altera S. *Bibliorum* ejusdem rationis Folior. 317. in principio et fine pariter adscripta *Monasterio S. Johannis in Seycz cartus.* ordinis omisso *Psalterio* progreditur a *Libellis Salomonis*, qui *Capitulationes* praemissas habent, *Canticum Cant.* vero etiam interfecta *Colloquentium* nomina. Ad calcem *Ecclesiastici* absque titulo comparet *Locus* ille e *Reg.* III. c. 8. et *Paralip.* II. c. 6. *Et inclinavit Salomon genua sua in conspectu totius ecclesie israel &c.* *Jeremiae* adjunctus est *Baruch*. Inter *Machabaeos* et *Matthaeum*, quo errore non liquet, incepta sed mox abrupta est *Apocalypsis*, quae demum post *Actus Apost.* a capite resumta est. Hanc excipiunt VII. *Epistolae Canonicae*, ubi I. *Joh.* c. 5. famosum *Testimoni-*

um a prima manu hodie sic legitur: *et hij tres unum sunt. Et tres sunt qui testimonium dant in celo. pater. uerbum. et spiritus.* Dein jam rasum et rescriptum: *Et hij tres unum sunt.* Iterum a prima manu, sed inductum: *in terra. spiritus. aqua. et sanguis.* In margine vero omnibus his praeponendum notatur ab alia manu: *Quoniam tres sunt qui testimonium dant in terra spiritus. aqua. et sanguis.* Vides, quam labem *Voces* eadem brevi intervallo redeunt per *Scriptorum* incitiam, aut incuriam *Codicibus* late induxerint. Sub finem iterum initium datum est *Paulinis Epistolis*; verum eae jam integrae Parte priorre habentur.

## VIII.

Codex membraneus lat. Sec. H. r XIII. Folior. 389. 4. min. per duas columnas admodum nitide, minutissime tamen exaratus, literis initiorum, inscriptionibusque picturatis continet vulgati Interpretis *Sacra Biblia* praemissis *Hieronymi* Prologis, notisque Argumentis hoc ordine: *Pentateuchus, Josue, Judices, Ruth, Libri IV. Regum, II. Paralipomenon, I. Esdrae, Nebemias, Esdrae Secundus, id est, Tertius apocryphus, Tobias, Judith, Esther, Job, Psalterium, Libri Salomonis, Sapientia, Ecclesiasticus, Prophetae majores et minores, II. Machabaeorum, IV. Evangelia, Epistolae Paulinae, Apocalypsis, Actus Apostolorum, Epistolae Canoni-*